



**REPUBLIKA E SHQIPËRISË**  
**KOMISIONERI PËR MBIKËQYRJEN E SHËRBIMIT CIVIL**  
**DREJTORIA E PËRGJITHSHME E INSPEKTIMIT DHE MBIKËQYRJES**

Nr. 871/1 prot.

Tiranë, më 18.11.2024

**VENDIM**  
**Nr. 69, datë 18.11.2024**

**PËR**  
**PËRFUNDIMIN E PROCESIT TË VERIFIKIMIT TË EKZEKUTIMIT TË**  
**VENDIMIT TË KOMISIONERIT NR. 21, DATË 02.03.2023**

Në mbështetje të kompetencave ligjore të parashikuara në nenet 11, pika 1 dhe 14, të ligjit nr. 152/2013, “Për nëpunësin civil”, i ndryshuar, dhe Rregulloren, “Mbi procedurat e mbikëqyrjes/inspektimit”, miratuar me vendimin nr. 17, datë 11.03.2015, të Komisionerit për Mbikëqyrjen e Shërbimit Civil, (e ndryshuar), pas shqyrtimit të relacionit dhe mendimit paraprak të Drejtorit të Përgjithshëm të Inspektimit dhe Mbikëqyrjes dhe Drejtorit për Zbatimin e Vendimeve Paralajmëruese dhe Koordinimit, në lidhje me verifikimin e zbatimit të Vendimit nr. 21, datë 02.03.2023, të Komisionerit, “Për miratimin e raportit përfundimtar të mbikëqyrjes së administrimit të shërbimit civil gjatë realizimit të procedurave të vlerësimit të rezultateve në punë të nëpunësve civilë në aparatin e Ministrisë së Bujqësisë dhe Zhvillimit Rural dhe paralajmërimin e institucionit për të rregulluar gjendjen e ligjshmërisë”.

**KONSTATOVA SE:**

Me vendimin nr. 105, (569 Prot.), datë 15.07.2022, “Për kryerjen e mbikëqyrjes në lidhje me zbatimin e ligjshmërisë gjatë procesit të vlerësimit të rezultateve në punë të nëpunësve civilë në aparatin e Ministrisë së Bujqësisë dhe Zhvillimit Rural”, Komisioneri për Mbikëqyrjen e Shërbimit Civil ka vendosur fillimin e mbikëqyrjes tematike në lidhje me zbatimin e ligjshmërisë gjatë kryerjes së procedurës së vlerësimit të rezultateve në punë të nëpunësve civilë në aparatin e Ministrisë së Bujqësisë dhe Zhvillimit Rural, duke vlerësuar respektimin e kërkesave të ligjit nr. 152/2013, “Për nëpunësin civil”, i ndryshuar dhe vendimit nr. 109, datë 26.02.2014, të Këshillit të Ministrave, “Për

*vlerësimin e rezultateve në punë të nëpunësve civilë*”, i ndryshuar, nga zyrtarët e ngarkuar prej ligjit për realizimin e këtij procesi.

Ky proces është përmbyllur me Vendimin nr. 21, datë 02.03.2023, të Komisionerit, “*Përmiratimin e raportit përfundimtar të mbikëqyrjes së administrimit të shërbimit civil gjatë realizimit të procedurave të vlerësimit të rezultateve në punë të nëpunësve civilë në aparatin e Ministrisë së Bujqësisë dhe Zhvillimit Rural dhe paralajmërimin e institucionit për të rregulluar gjendjen e ligjshmërisë*”, ku janë lënë detyra konkrete për rregullimin e ligjshmërisë.

Me kalimin e afatit të lënë në vendimin e mësipërm, Ministria e Bujqësisë dhe Zhvillimit Rural ka informuar Komisionerin me shkresën nr. 1453/1 prot., datë 01.08.2023, “*Mbi zbatimin e vendimit nr.21, datë 02.03.2023*”, protokolluar me tonën me nr.17/4, datë 03.08.2023, Komisioneri është informuar mbi masat e marra nga institucioni.

Në kushtet kur, përgjigjja e institucionit nuk ishte ezauruese, Komisioneri, në datën 16 shtator 2024, i është drejtuar me anë të komunikimit elektronik Departamentit të Administratës Publike, duke kërkuar një informacion për të gjitha ministritë që i janë nënshtruar procesit të mbikëqyrjes me objekt vlerësimet e punës të nëpunësve civilë. Ky i fundit, me e-mailin e datës 14 shtator 2024, i është përgjigjur kërkesës së Komisionerit, duke parashtruar situatën e ecurisë së procesit në këto institucione.

Mbështetur në detyrat e lëna në Vendimin nr. 21, datë 02.03.2023, si dhe bazuar në përgjigjen e institucionit dhe njësisë përgjegjëse (DAP), lidhur me veprimet administrative të kryera prej tyre, konstatohet se situata e administrimit të shërbimit civil në institucionin e Ministrisë së Bujqësisë dhe Zhvillimit Rural paraqitet si më poshtë vijon:

Në pikat 2-6 dhe 9-10, të vendimit objekt i këtij verifikimi, Komisioneri ka kërkuar nga subjektet e ngarkuara nga ligji me detyra të posaçme në administrimin e shërbimit civil gjatë procesit të vlerësimit të rezultateve në punë të nëpunësve civilë (*zyrtarët raportues, kundërfirmues dhe autorizues*) të marrin masat si më poshtë:

- Të plotësojnë hapësirat përkatëse të dedikuara për komente dhe shpjegime;
- Të merren masa që të gjithë zyrtarët e procesit të vlerësimit të kenë njohuri të plota për realizimin e procedurës të vlerësimit;
- Të identifikojnë kërkesat e nëpunësve të vlerësuar për trajnim dhe mundësi zhvillimi të veçantë profesional;
- Të hartohet një plan trajnimi me karakter të posaçëm për kryerjen e detyrave të veçanta që ju vendos zyrtarëve të vlerësimit legjislativi i shërbimit civil;
- Njësia e burimeve njerëzore e institucionit të përfshijë në Regjistrin Qendror të Personelit dhe dosjen e personelit formularin e vlerësimit për çdo nëpunës civil.
- Të plotësojnë rubrikën përkatëse me arsyen e rivlerësimit, në ndarjen DH, “*Rivlerësimi*” të formularit në përputhje me kërkesat ligjore.

- Njësia e burimeve njerëzore e institucionit të informojë zyrtarët e vlerësimit për detyrat që duhet të realizojnë në të ardhmen për procedurën e vlerësimit për çdo punonjës për periudhën e kërkuar.

Referuar përmbajtjes së shkresës së sipërcituar të MBZHR, nga ana e këtij institucioni relatohet se janë marrë masat administrative që lidhen me procesin e vlerësimit periodik të nëpunësve civilë, të cilat janë reflektuar në vlerësimet janar-qershor të vitit 2023 dhe në rastin e rivlerësimit të nëpunësve është plotësuar ndarja DH “Rivlerësimi” të formularit në përputhje me kërkesat ligjore.

Sa më sipër konfirmohet edhe nga njësia përgjegjëse (DAP) në e-mailin e datës 14.10.2024, dërguar Komisionerit, ku theksohet se detyrat e lëna për vlerësimet e nëpunësve civilë deri në nivelin e mesëm drejtues janë zbatuar referuar përcaktimeve të akteve nënligjore në fuqi.

Në lidhje me rekomandimin për hartimin e një plani trajnimi me karakter të posaçëm për kryerjen e detyrave që ju vendos zyrtarëve të vlerësimit legjislativi i shërbimit civil, njësia e burimeve njerëzore në këtë institucion, me shkresën nr. 2939 prot., datë 18.05.2023, i ka komunikuar Shkollës Shqiptare të Administratës Publike (ASPA), nevojat për trajnime sipas kërkesave të përcjella nga drejtoritë/sectorët e këtij institucioni.

Në pikat 7 dhe 8 të dispozitivit të vendimit, Komisioneri ka kërkuar nga Departamenti i Administratës Publike, në cilësinë e njësisë përgjegjëse, të drejtojë procesin e vlerësimit për TND-në, në mënyrë që formularët e vlerësimit të plotësuar dhe të nënshkruar nga Komisioni Kombëtar i Përzgjedhjes, t’i përcillen zyrtarisht nëpunësve civilë anëtarë të TND-së, \*\*\*\*\*, \*\*\*\*\*, \*\*\*\*\*, \*\*\*\*\* dhe \*\*\*\*\*.

Me anë të komunikimit elektronik të datës 14.10.2024, DAP ka informuar Komisionerin se përsa i takon vlerësimeve për TND-në, ato janë në fazë shqyrtimi dhe diskutimi së bashku me ministrinë e linjës për finalizimin e këtij procesi.

Për sa u përshtrua më sipër, vlerësoj se, nga ana e institucionit janë zbatuar detyrat e lëna në pikat 2- dhe 9-10 të dispozitivit të vendimit.

Ndërsa sa i takon vlerësimeve për Trupën e Nivelit të Lartë Drejtues, nisur nga kompleksiteti i veprimeve që duhet të kryhen në këtë rast, si dhe nga organizmi specifik që duhet t’i kryejë këto veprime, bazuar edhe në pikën 4, të nenit 36, të Rregullores “Mbi procedurat e mbikëqyrjes/inspektimit”, miratuar me vendimin nr. 17, datë 11.03.2015, të Komisionerit, (e ndryshuar), vlerësoj se pikat 7 dhe 8 të vendimit duhet të jenë objekt i kontrollit gjatë mbikëqyrjes së radhës në subjekt ose mbikëqyrjes së orientuar që ushtrohet në vijimësi gjatë gjithë vitit, ku informacioni mbi ecurinë e procesit dhe realizimin e detyrës nga ana Ministrisë së Bujqësisë dhe Zhvillimit Rural t’i përcillet inspektorit që e mbikëqyr këtë subjekt.

## **PËR KËTO ARSYE:**

Bazuar në nenet 11, pika 1 dhe 14 të ligjit nr. 152/2013, “Për nëpunësin civil”, i ndryshuar; ligjin nr. 44/2015 “Kodi i Procedurave Administrative të Republikës së Shqipërisë” dhe Rregulloren, “Mbi procedurat e mbikëqyrjes/inspektimit”, i ndryshuar, miratuar me vendimin nr. 17, datë 11.03.2015, ndryshuar me vendimin nr. 158, datë 30.12.2022, të Komisionerit për Mbikëqyrjen e Shërbimit Civil.

## **VENDOSA:**

1. Përfundimin e procesit të verifikimit të zbatimit të Vendimit nr. 21, datë 02.03.2023, të Komisionerit, “Për miratimin e raportit përfundimtar të mbikëqyrjes së administrimit të shërbimit civil gjatë realizimit të procedurave të vlerësimit të rezultateve në punë të nëpunësëve civilë në aparatin e Ministrisë së Bujqësisë dhe Zhvillimit Rural dhe paralajmërimin e institucionit për të rregulluar gjendjen e ligjshmërisë”, për pikat 2 – 6 dhe 9-10 të dispozitivit të këtij vendimi, për shkak të rregullimit të ligjshmërisë nga ana e institucionit.
2. Konstatimin e rregullimit të ligjshmërisë nga ana e institucionit Ministria e Bujqësisë dhe Zhvillimit Rural, duke zbatuar detyrat e lëna në pikat 2 – 6 dhe 9-10 të dispozitivit të Vendimit nr.21, datë 02.03.2023.
3. Njësia përgjegjëse, Departamenti i Administratës Publike, në përfundim të procesit të vlerësimeve për Trupën e Nivelit të Lartë Drejtues, të njoftojë Komisionerin në lidhje me realizimin e detyrave të lëna në pikat 7 dhe 8, të vendimit 21/2023, të Komisionerit.
4. Për këtë vendim të njoftohet njësia përgjegjëse, Departamenti i Administratës Publike.
5. Ky vendim hyn në fuqi menjëherë.

## **KOMISIONERI**

**Pranvera Strakosha**